

Deq Seizcin Va Langh, Daeuj Baksak Guhcaemz

待春暖花开, 来百色做客

□ Maknam comz hoiz



▲ Doz swliu: Giucouh Gujcin.

Aenvih ciengz binghraq neix, Baksak sawq-mwh okmingz lo. Doengh boux buek youq baihnaj dingjhoenx binghraq haenx mbouj lau dwgrengz, daemhdwngx ruij gaiqhongdawz, byaij gvaq roen loemq, benz gvaq roen bya gumzgamx raeuzrad haenx, dangh gvaq raemxgip, roxnaeuz cau huz, naengh cidienhbingz, cisamloek, dohlahgih daengj, daengz gak mbanj gak ranz bae guh hwzsonh genjcwz. Vunzmbanj mbouj rox aeu maz bae docih, couh aeu gijgwn ceiq ndei bae daiq, lumj nohgouq, haeuxfaengx, haeuxnaengj, saejlwed daengj. Dah-youqgyangh riuznoengnoeng, mboujdan gung ok aen singz yinghyungz ndeu, ganq ok doengh gij vunz lauxsaed simndei de, lij miz gij byaraemx lajmbwn gyaеundeі de.

Aen Suen Geiqniemh Baksak Gijyi

Aen suen neix miz aen gvanj geiqniemh, aen minzcuz bozvuzgvanj, gaiq sigbei geiqniemh, diuz giuz hungzginh daengj, dwg giz diegbaeyouz lizsij hoengz caeuq vwnzva minzcuz doxyaux doxyungz ndeu. Ndaw gvanj geiqniemh miz lai aen ding, langhbaij gij saeh caeuq gij doxgaiq Baksak Gijyi, hawj vunz lumjbaenz dauqma daengz doenghbaez, gamjsouh gij haemzhøj dwgrengz bouxgonq.

Ngozcenz

Ngozcenz laeng Cingsih youh heuhguh Mboq-

lingz, baenz bi mbouj mbaet, sawdik lumj gingq. Seiqhenz bya heu daengjsoengz, nazhaeux bingzrwd, gyaеu lumj fuk veh. Gwnzmoq gaq diuz giuz miz 15 conghungj ndeu, daengngoengz banhaemh baez ciuq, 15 conghungj deng ciuq rongh, couh lumj 15 aen ronghndwen gaeuznyeunyeu nei. Mingzciuz Gyahcing Vuengzdaeq dingqnaeuz, lij lok coh "ndit banhaemh ciuq Mboqlingz".

Luengq Hung Doenglingz

Luengq Hung Doenglingz caemh heuhguh "bak sieng gyaеundeі gwnz digiuz", yamq hwnj mbaek-lae, couh ndaejnyi raemxgienghdat bauhrumxrumx, ngauj gvaq ndoi faex ndeu, Raemxgienghdat Doenglingz couh venj youq baihnaj. Seizfwn, raemxgienghdat couh lumj gyoengq max bongh bae, raemx dauqcawq biu, youh lumj Dahmbwn daj gwnz bongh doxroengz, hausaksak, ndei yawj raixcaix. Ndaw luengq miz 2000 lai cungj doenghgo sengcingz hwnj de, faex hung sangngaungau, gogaеu heuxgeuj, raemxgienghdat dauqcawq sinz, vunz lij heuh de guh "cauz luengq ceiq heu Cungguek".

Byagamjcuengh

Cienznaeuz, Baeuqroxdoh couh youq gwnz Byagamjcuengh youqdingh. Gwnz bya miz Miuhecoj-goeng, Rimmehnangz, Gamjcienggun, Gamj-hungzginh daengj diegbaeyouz. Moix bi liggaеuq ndwen sam cocaet daengz cogouj, gyoengqvunz lij doxcomz lajdin Byagamjcuengh guh aen Hawfwen Gamjcuengh, buizcae q Baeuqroxdoh, doxdax doiq-fwen, foux saeceij daengj. Daj ciuhgeq daengz seizneix, gij vwnzva Baeuqroxdoh Bouxcuengh gizneix cienz ndaej gig ndei.

Aen Gunghyenz Ndoengfaex Mbaw Hoengz

Seizcou, ndaw gunghyenz mbawraeu hoengzfwg lumj feiz, raemx ndawhuz fubfab, daj gwnz daengz laj, ndingfug, nding' oq, henjhoengz caeuq saekheu camca, lumj sei lumj veh, lij miz vunz haenh naeuz "mbawraeu Dwzbauj ndei gvaq gij Giujcaigouh". Dingqnaeuz, Dwzbauj aiq miz cib fanh moux faexraeu, baenz ndoi baenz ndoeng, yawj mbouj raen gyaеuj, hoengzhoengz henjhenj heuheu doxsan doxgeuj, hekyouz yawj dwk mboujsij ma.

Gumzmbwn Lozyez

Lozyez dwg "aen bozvuzgvanj gumzmbwn sei qgyaiq", ndawde "Gumzmbwn Dasizveiz" haijbaz sang 1468 mij, laeg 613 mij, bakgumz doengsae yiengq gvangq 600 mij, namzbaek yiengq gvangq 420 mij, aiq hung 6700 fanh lizfanghmij. Ndawde

miz conghroengj lajnamh, ndoengfaex nduj sei qgyaiq ceiq hung, doenghgo doenghduz dijbauj caeuq mehraemx, dwg aen dieg sengcingz hungmbwk ndeu.

Baksak lij miz Giucouh Gujcin, Cwngzbiz Huz, Gizyangz Huz, Gizsinghyenz Ginggih Dwzbauj, Haugunh Huz Lingzyinz daengj diegbaeyouz, gak miz daegsaek. Deq binghraq lizbae, seizcin va langh, baengzyoux mwngz ndaejgeiq daeuj Baksak yawjyawj bw.



▲ Doz swliu: Aen Suen Geiqniemh Baksak Gijyi.



▲ Doz swliu: Ngozcenz.



Doz swliu: Haugunh Huz.